

MME MBET DUOPEBA EMI EKESIODE

EDQÑ

Matthew 10:1-42

QYQHQ UKPEP-ÑKPQ 81

Eke Mkparawa

IKQ IBUOT: “Koro ọkpọn Mi ememem, mbiomo Mi onyūn efefere” (Matthew 11:30).

Etọñ Nte Mbet, Ekabare Edi Mme Asaña-utom

Ke eritọñ utom Jesus, Enye ama emek owo duopeba ndidi mbet me mme asaña-utom Esie. Mmọ ema ekpọn ufok ye utom mmọ etiene Jesus. Ema enyūn edu ye Enye ke ini Enye ekekpepde ñkpọ ke enyọn Obot. Mmọ ema edu ye Enye ke inyañ Galilee ke ini oyobio okodobode oto ke ikọ Jesus. Mmọ ema ekut Enye anamde ediwak utibe-ñkpọ, ọkọkde owo emi ekenyenede demon, ñwan emi okotukde mben ọfọn Esie ama okop nsọñidem, enam eyen-añwan Jairus eset ke mkpa, ye ediwak mme utibe-ñkpọ eken.

Ekekot mmọ emi esioño ke nsio-nsio ubok-utom, mme ọkọ- iyak, mme ọbọ-utom, mbet John Oduok-Owo Mmọñ, edi mmọ ekebọ ukem ukpep-ñkpọ eto Jesus. Idaha emi mmọ ekenyene ndidi mme Apostle, emi ọwọrọde “edọñ eka.” Ekedọñ mmọ eka nte ata mme ntiense, ndikwọrọ nnyūn mkpep mbaña Jesus Christ. Ntiense edi enye emi etiñde se enye okutde onyūn ọfiokde oto ke idem esie idighe se owo etiñde ọnọ enye. Ke ukperedem, ke ini ekemekde Mbet ndida itie Judas, ekeyom mme owo emi “ekesañade ye nnyin ofuri ini emi Ọbọñ Jesus ododuk ọwọwọñ ke otu nnyin, tọñ ke baptism John tutu osim usen emi emende Enye edok ekpọn nnyin” (Utom Mme Apostle 1:21, 22).

Jesus ọkọdọñ mme owo emi edotde ndidi mme Asaña-utom Esie. Enye ọkọdọñ mme mmọ oro ekenyenede ifet ndidu ye Enye, emi ema ekebọ ukpep-ñkpọ eto Enye, ye emi ema ekenyūn enyene nsio nsio ifiok eto Enye. Mfin emi Abasi idọñke owo ekededi ndisuan Eti-mbuk; Enye oyom mmọ oro ema ekenyene ifiok ebaña odudu Esie ekwọrọ.

Ama okpon akan ndisese nte Christ anamde mme utibe-ñkpọ. Koro enye ama ọnọ mmọ ñko unen ye odudu ndibin ndidehe spirit kpa ye ndikok kpukpru oruk udọñ. Edi ñkpọ kiet nditiñ enyin nse ukpuhọre ke uwem owo emi akabarede edi Anditiene-Christ, ndikop nte enye etiñde ikọ ntiense, ndise nte anamde utom Ọbọñ, edi edi ñkpọ efen ndinyene ifiok ye odudu Abasi ke uwem nnyin.

Mme mmọ emi ema etọñ ndidi mme anditiene Jesus, ndien Enye okot mmọ ndidi mme ọkwọrọ-ikọ. Ke ini nnyin itọñde isañ owo Abasi nnyin ifiokke se Abasi onimde ọnọ nnyin, mme utọ itie eke Enye edikotde nnyin isin. Ñkukure ñkpọ edi nnyin ndikop uyo, ntre ke nnyin idinyene ikọ ntiense nte Paul, “ñkọsọñke ibuo ye ñkukut emi otode ke heaven.”

Mme Item

Nte Jesus ọkọdọñde mme Mbet emi ete ekesuan etop Eti-mbuk, Enye ama ọnọ mmọ saña-saña item abaña ebiet, se mmọ edikwọrọde, ye nte edikwọrọde. Onyūn onọ mmọ mme eñwọñ, ntọt ye ikọ nsọñidem adian do.

Ke utọ ini emi, mmọ ekenyene ndikwọrọ nnọ mme Jew ikpọñ, mmọ emi Enye akadade odomo nte mme erọñ emi esopde, emi ekemede ndikop biọñ nnyūn mkpa; koro Israel mikenyleneke andikpeme. Ke ukperedem, ema edọhọ mme Mbet ekwọrọ enọ mme Idut. Jesus ọkọdọhọ ete, Usen Pentecost ama ebe, yak mmọ ekekwọrọ Ikọ Abasi ke Samaria tutu osim utit ererimbot.

Etop mmọ akana edi: “Ubọñ Heaven ke ekpere.” Emi edi ukem etop emi John ọduok-owo-mmọñ ọkọkwọrọde, onyūn edi ukem etop emi ke mme ọkwọrọ-ikọ nnyin ekwọrọ mfin.

Mmọ ekenyene ndikwọrọ nnyūn ñkọk udọñ ke mfọn, kpa nte Christ akanamde. Enye ọdọhọ ete “Ọfọn ndino akan ndibọ” (Utom Mme Apostle 20:35). Ọbọñ ama ọdọhọ mme Mbet Esie ete mmọ ekuda okuk mme ukpuhọ ọfọn, koro Enye ama ọfiok ete ke mme ñkpọ uwem emi eyekabare edi mbiomo, mme, ubiọñ. Mfin emi ndusuk owo ekabare esin esit ke okuk ye inyene mmọ, emi anamde Jesus ye utom Esie ekabare eda udiana itie ke uwem mmọ utu ke ekpedade akpa itie.

Jesus ama ọdọhọ Asaña-utom etie ke ufok emi enyimeke mmọ. Edieke owo minyimeke mmọ, yak mmọ eka ke ebiet emi eyomde mmọ. Nso idiok nte owo ndisin Eti-mbuk nnyūn mbiọñ edisuan esie. Ndusuk mmọ emi mikonyimeke ikenyleneke aba ufañ efen. Ema eteme mme Mbet ete ekeñ ntan ikpat mmọ eduok ke ufok mme obio eke owo minyimeke mmọ. Mmọ inyeneke ndisua nnọ, mme ndikpe ubok, mme ndifaña ye mmọ. Anditiene-Christ inyeneke spirit “ndisio usiene,” ke Ñwed Mbon Rome 12:19 nnyin ikot, “Jehovah ete, usiene enyene Mi, Ami nyesio usiene.”

Mme Ukọbọ

Ke ini Jesus ama okosio mmọ ọdọñ, Enye ama etiñ ọnọ mmọ ete ke mmọ eyesobo ye ubiọñọ. Nte ukọbọ okosimde Jesus ntre ñko ke edisim mme Asaña-utom Esie — nte mme erọñ ke ufọt mme ekpe-ikọt. Mme ekpe-ikọt edi asua mme erọñ. Edieke mmọ enyenede ufañ, mmọ eyewot enyuñ eta mme erọñ. Nditọ Abasi kpukpru ini esinyene mme asua, enyuñ esuk enyenyene mme asua emi ekemedede ndisobo mmọ ofuri-ofuri, edieke mmọ ekpenyenede ufañ. Abasi ọnọ ikọt Esie ntọt ndidu ke ntiñ-enyin man oto do ekunọ asua ufañ ndibiat mmọ.

Ke utọ ntak oro ema edọhọ mme Mbet ete, “enyene ibuoat nte urukikọt, enyuñ efure nte ibiom.” Ke iñwañ Eden Satan akasaña ebe ke urukikọt koro enye akarade ñkari onyuñ ọfiokde ñkpọ eti-eti. Eda ibiom ke ediwak ini ndiwut emem, ñkpọ emi asanade, ima, me ifure-ifure ido. Ibiom akananam inamke baba owo idiok, me ñkpọ kiet ekeded, inyuñ inyenke ukpeme inọ idem esiemọ. Ke mme ndusuk idaha, ñko, esida Anditiene-Christ edomo nte ibiom. Nte ibiom akadade eti mbuk nsat isọñ ọsọk Noah, ntre ke Anditiene-Christ asuañ nti mbuk. Ikwo Solomon ada ibiom nte uwut-ñkpọ udọñ Ufọk Abasi ke abaña editọñ ntak ndi Christ. Enam idiọñ ete ke ibiom esima ndifre unan esie usọp-usọp. Anditiene-Christ ama mme asua esie, anam eti ye mmọ eke esuade enye, onyuñ ọbọñ akam abaña mmọ eke ekọbode enye (Matthew 5:44). Kpukpru mme ido emi, ifure-ifure ido eke ibiom, **ye** eti ibuoat ye ọniọñ eke urukikọt adiana kiet ndinam ido **Anditiene**-Christ. Emi edi mme ñkpọ eke Ọbọñ nnyin oyomde oto mme mbet Esie. Owo Abasi enyene nditiñ ikọ uko-uko, nnyuñ nsọñ nda ndiñwana Satan ye idiok-ñkpọ, edi anam enye emem emem. Enye inyenke ndiyak idem esie nnọ mme anam-idiok edi etiñ akpanikọ emi Jesus ọkọdọhọde, “Akpanikọ eyenyuñ anam mbufo ewọrọ ufin.”

Jesus ọnọ mme mbet ntọt ete ke mme owo eyesua mmọ, enyuñ enọ mmọ esọk mme andikara man ebup mmọ ikọ koro mmọ edide mme Anditiene-Christ. Edi Enye ọdọhọ ete ke Spirit Abasi eyetiñ ọnọ mmọ se edibọrọde.

Ukpeme

Mme ikọ ntọt emi ekpesin ndik ke esit ndusuk owo, edi Jesus kpukpru ini ọfiok ini eke Enye ọnọde nsọñ-idem. Enye etiñ abaña ukama ye ukpeme Abasi. Nte nnyin ikotde mme utibe ikọ ndọñesit, eti nnyin ete ke ikanaha inọ mme Mbet ikpọñ, edi ye kpukpru mme anditiene Christ. Nte Abasi ọkọfiokde kpukpru abaña mme Mbet, ntre ñko ke ọfiok kpukpru abaña nnyin. Ebat kpasuk kpukpru idet ibuoat nnyin. Nnyin imọsọñ urua ikan ñkpri inuen, emi ebatde nte usuhọre ñkpọ, emem urua enyuñ efọn ke ata ekpri usuñ. Edi kere nte Abasi esinede mmọ ñkpọ, ọnọ mmọ udia, ekpeme mmọ, ọnọ mmọ ikwo onyuñ ọfiok iduọ mmọ. Abasi iditreke ndinam ye nnyin kpasuk ntre.

Ndiyarade Christ

Ndiyarade Christ ke iso owo edi ukpọhọre ukpeme Abasi ke spirit ye ke ikpọhidem. Edi ata akpan ñkpọ emi owo mikpetreke ndinam mme ndisin. Edi -- ediyarade Christ ke iso mme owo -- ediwut mme Jesus ọdiọñ nnyin. Ediwak usuñ edu ndida nyarade Christ: kiet edi nditie ntiense ke iso mme owo, edi idighe oro ikpọñ. Ndusuk owo ekeme nditiñ ediye-ediye edi uwem mmọ ke usen ke usen asaña isio ye ikọ mmọ. Ke ukem usuñ oro, ndikañ Christ okpon akan ndisin Enye ke iso mme owo. Nditre ndiyak Jesus oduk ke esit owo, ndisin ndinọ Abasi se oyomde, ndisin Enye ye utom Esie, kpukpru emi edi edikañ Christ. Owo ikemeke ndikabare ndi Anditiene Christ ndibe-ndibe ndien mme owo etre edifiok enye. Ke Matthew ibuoat itiaba enam nnyin ifiok ite, “Eti eto ikemeke ndiñwum idiok mfri, mbiara eto inyuñ ikemeke ndiñwum eti mfri. . . Ntre ke mbufo edida mfri mmọ efiok mmọ.”

Mme Asua Owo

Jesus ama ọdọhọ mmọ ete ke Anditiene-Christ ekeme ndinyene ubiọñọ nto ubon esie. Mmọ emi enyañade ke ubon edu uwem isio-isio ye mmọ emi minyañake. Ete ye eka eke mibọhọ erinyaña ekeme ndibiọñọ eyen eke ọfiokde Abasi; ke ediwak idaha esidi eyen emi mibọhọ erinyaña esibiọñọ ete ye eka eke enyañade. Mbubehe mmọ idighe aba ukem-ukem, idem edidiana kiet emi okodude ke akpa iduhe aba. “Nso udeme ke edinen ido enyene ye ukwañido? Nso ebuana ke uñwana enyene ye ekim?” (2 Ñwed Corinth 6:14).

Ndien ñko, nnyin imema mme ubon nnyin eti-eti. Edi Ñwed Abasi anam nnyin ifiok ite ke ana Abasi enyene akpa itie ke esit nnyin. Ke ntre ana imek, ndima Abasi ñkan kpukpru, me ndima ubon nnyin, me owo efen ñkan Abasi. Edieke nnyin iyomde ndidi mme anditiene Christ, Enye eyedi, onyuñ enyene ndidi akpa. “Anie edidianare nnyin ke ima Christ?” (Ñwed Mbon Rome 8:35).

Owo ndimen krọs esie okpon akan ndiyọ mme idomo ke ntak Eti-mbuk. Oro ọwọrọ ndinyime ndiyak idem ye ini nnọ utom Christ. Ke enyin ererimbot, etie nte owo eke amade ndinam utom Abasi, ọduok uwem esie, edi ke akpanikọ enye akam enyene nsinsi uwem. Owo idotke ndibọ mme edidiọñ ye mfọn emi edude ke ima Abasi ibọhọke enye ayak uwem esie ọnọ Enye.

Anditiene-Christ imenke krọs ikpọñ edi enyene nditiene Jesus. Akam ye nyak idem esie edi: “Ndinam se Enye oyomde mi nnam, ndidi se Enye oyomde mi ndi, ndika ke ebiet emi Enye oyomde mi ñka, nditiñ se enye oyomde mi ntiñ.” Owo ekeme, nte Peter, ndisin kpukpru ñkpọ ntiene Jesus, ndien udomo edi, mme nnyin iyenam akpanikọ, inyuñ itiene isim utit. Jesus ete, “eyenyaña owo eke edimede ime tutu osim akpatre” (Matthew 10:22).

Mme Utip

Kpa nte ekeñwọñode utip enọ mme mbet emi ekenamde akpanikọ, kpa ntre ke edinọ nnyin utip ke utom emi inamde inọ Abasi. Ke uwem emi nnyin ikut akwa mfọn ye uyuhọ ke utom Ọbọñ, edi ikureke ke oro. Ke Heaven eyedeme utip, idighe ke ntak akwa utom edi ke ndinam utom akpanikọ. Mme mbet ema enam utom Abasi ke ukem ntak emi nnyin inamde mfin. Nnyin iyom ndinam utom Abasi koro imade enye, idighe man ibọ itoro mme utip ito owo.

MME MBUME

1. Anie ọkọdọñ mme mbet utom?
2. Nso edi ntak emi Enye ọkọnọde mmọ odudu?
3. Ekedọñ mmọ etiene mme anie?
4. Nso ke mmọ ekekwoqo?
5. Nso edi ntak emi nnyin iyararede Christ ke iso mme owo?
6. Tiñ enyiñ mme mbet duopeba oro ke ibuot.